

DO LAIŠKĀ V. MĒKUOLAITIOU-POTĒNOU

Pavasarinis

...Vo džiaugtēis neznuočēi gīventē.

Gīventē neznuočēi kēntietē.

Nuors je tas gīvenēms tie švēntē,

Ož diekou kētēms prižadieta.

Jug vēskas – ēš nieka i nieka,

Je čiesos nošlousta kap dolkēs.

Vo žuodē nesvietēška spieka

Ēr prikel, ēr kert... Ligo kolkuoms.

Bet rasint tēn īr dā nuors mirksnis,

Ka žuodē tēp tērpst ligo paukštē...

Ēr tol, kol i nieka pavirsi,

Mēnkoma dēdībē gal jaustē.

Rodēninis

Ka apšals nežēnuojēmo akis,

Nosētvierosēs dumblēna dongo,

Ēr jau, vuortinklē kēlpuo ēšsekēs,

Kriuokaus vies, atsēklāpēs po longo,

Dā nebūsi priējēs tuo taška,

Ka nebvuožuotē rēk, vo jau dērbtē...

Nuors sēlpnoms, vēsa sīla ēšblaškēs,
Kronks: nē kuoju, nē sparnū pakēltē.

Rēks basam dā ilēptē i kalna,
Apliediejusi, apipostīta...
Kap i Pondēiva ēštēista delna...
Kap i sapna, pagimdiusi rīta.

Lēks dā vēina akēmērksnē slēnkstis,
Pri katruo kuožnos šliaužē ar biega...
Kap pri krīžiaus... Tik galva nolēnktē...
A sokrētēs pavērstē i nieka.